

# Lamentu di u castagnu à u corsu

Or chi l'averaghju fattu  
A lu corsu cusì ingratu  
Chi m'ha fattu la sentenza  
E à morte cundannatu  
Senza sente tistimoni  
Ne cunsulta lu giuratu.

M'ha dichjaratu la guerra  
Cume à un veru malfattore  
M'ha messu li sbiri apressu  
Chi m'attacanu terrore.  
O Corsu, rifletti un pocu,  
Versi me si senza core.

Cume à un banditu da forca  
Tu m'hai messu lu taglione ;  
Di tutta la me famiglia  
Voli tu la distruzione.  
O Corsu, s'hella ti piace,  
Dammi una spiegazione,

M'hai chjappu a l'arma bianca,  
Tu per esse piu sicuru,  
Quandu impronti lu mio fiori,  
Quandu lu fruttu è sicuru.  
Un mi porti alcun rispettu,  
O Corsu, si cusi duru!

Ne voli vede la fine,  
Tu un guardi la stagione  
Cull'arme sempre in campagna,  
A mazzola e u sigone,  
Da la matina à la sera,

Batti senza cumpassione.

Subitu tagliatu à pezzi  
E per mettemi in pappina  
Chjami li to mulaterri  
Per cunducemi à l'usina;  
O Corsu, rifletti e pensa  
Chi faci la to ruina!

A un suppliziu senza nome  
O Corsu, m'hai cundannatu :  
A passà sottu à le seghe  
E coce cume un dannatu;  
In botte chjirchjate in farru  
Sò subitu imprigiunatu.

Un sentu in tutte le borghe  
Che tintenne e tintennoni,  
Bestemmie di mulateri,  
Lu fiscu di li sigoni,  
E di mule, carri e trenni  
N'è pienu strade e stradoni.

E'na guerra dichjarata,  
Un è mica guerra finta;  
Un si pensa ad altre cose,  
Un si pensa che à la tinta.  
La mio povera famiglia  
S'ella dura è prestu spinta.

Un ti ne ricordi piu,  
Corsu di li tempi andati ?  
Di Sampieru e Sambucciu,  
Di tutti li to antenati,  
Quandu da tanti nemici  
Eranu sempre assaltati ?

Qual'è chi li siccuría,  
Chi si dava tanta pena ?

Qual'è chi li mantenía  
Ben purtanti, à panza piena ?  
Li mio frutti inzucarrati.  
O Corsu, rifletti appena !

Un ti ne ricordi più,  
Una sera, à lu fucone  
Tutta la to famigliola  
Cantava lu lazarone ;  
Eramu un vennari sera  
Di pane manc'un buccone.

Qual'è chi ti succurrí,  
O Corsu, in quella sirata,  
Chi mittiste la paghjola  
E feste una pulindata ?  
E cusì passaste alegra  
U restu di la nuttata.

Un annu nun ci fù granu  
E d'orzu manc'un granellu ;  
Fiore tandu un ne sbarcava,  
Trimavi da lu tardellu  
Chi ti dava Mamma Piera.  
E avale un sì più quellu ?

Qual'è chi ti rilevò,  
O Corsu in quella stagione ?  
Chi t'empía di pisticcine  
Ogni sabatu in curbone ?  
Eppo'avale ti sì messu  
O Corsu, à fa lu briccone !

Guarda quante pimpasculate,  
Quanti colpi aghju paratu !  
Da la fame quante volte,  
O Corsu, t'aghju salvatu!  
Ed avà da gran nemicu

Versu me sí dichjaratu.

Ti vindii li me frutti  
E'mpattavi li to affari ;  
Vistii li to figlioli,  
Rigulavi li scarpari ;  
Ingrassavi lu purcellu,  
Tutti l'anni avii danari.

Cantava lu mulinaru  
Ch'avia pienu lu mulinu,  
U cavallu galuppava  
Sott'à lu so carruzzinu,  
Chi per tuttu lu mio fruttu  
Era, O Corsu, un gran festinu.

Facii porte e purtelli,  
Sulai, casce e cascioni,  
Intempiavi la to casa  
Tu cu travi e cantilloni,  
Grazia, O Corsu, eppur la sai,  
A li mio gran figliuloni.

Ancu sin'à la to cascia  
Quando parti à l'altru mondu  
Ti furniscu, e sta sicuru,  
O Corsu, ch'io non cunfondu ;  
Bastardu di Sambucciu,  
Almenu rifletti à fondu !

Quando la guerra è finita,  
Chi sarà di te, mischinu ?  
Zappa puru lu to fornu  
E chjodi lu to mulinu :  
Parterai per lu mondu,  
Errente senza un quattrinu.

Ne farai lu tennifesta,  
E lustrarai le botte,

Durmerai cume i cani  
Quandu vinerà la notte  
Perchè vindetta dumanda  
L'alberu di le ballotte.

Sempre cu li stracci à collu  
Passerai piani e muntagne ;  
Camperai a erbiglie crude  
Racolte nu le campagne,  
Perchè vindetta dumanda  
L'alberu di le castagne.

La to cumpagna di strada  
Sarà sempre Mamma Piera ;  
Per tuttu la truverai,  
Sempre ti sarà sincera ;  
Ti farà di la so scorta,  
Corsu, lu portabandera

E famitu cume un braccu  
Criparai dentru à un fossu.  
Li padroni di l'usine  
Diceranu : »Tarra addossu,  
Chi lu nostr'affare è fattu. »  
Pensa bè, rifletti, o Corsu.

Chi ti poi sempre rimette  
Di tutti l'errori e sbagli.  
Mandali à fà le sighere  
A sa mansa di canagli ;  
Cusi abanduneranu  
L'usine cu li travagli.

E lu to caru Castagnu  
Risterà duv'ellu è natu,  
A lampatti lu so fruttu,  
Tantu dolce e inzuccheratu,  
E cusì sarai, o Corsu,

Cume nanzu invidiatu.

*Paoli di Taglio*

*Eric Mattei*